

Sur fossa da revendissim sur canoni Giusep Aluis Brugger



Il meins vargau vegnan dus gronds amitgs ad esser s'entupai leuvi en la perpetnadad: Sur canoni Aluis Brugger ed il pader Maurus Carnot. Vivess lez aunc, savess el bein rapportar il meglier el Pelegrin in maletg da siu amitg defunct. Schegie cun entginas retenentschas, selubin nus tonaton da tarmetter in per lingias d'engrazieivla regurdientscha sur fossa da quei meriteivel e bien augsegner.

La via terrestra da sur canoni Brugger ei stada liunga, stentusa e zun fritgeivla. El ei naschius ils 5 da settember 1871 en tiara jastra a Messina en Sizilia ed ei vegnius cun miez onn a Rueras. L'entschatta dil gimnasi ha il talentus buob fatg en claustra a Mustér (nua ch'el ei staus scolar dil giuven pader Maurus) e concluidu quel a Friburg.

Il studi teologic absolva el a Cuera el seminari da s. Leci. In cuort temps anflein nus el aunc all'universitat da Löwen, nua ch'el ei vegnius en contact cun cardinal Mercier. En relativamein paucs onns da scola, acquista il defunct ina gronda savida en fatgs da filosofia e teologia. Cun quellas pussentas armas ei Sur Brugger staus a siu temps in da nos emprems exponents el combat dallas ideas sut l'egida dil renomau «liun» da Trun dr. Casper Decurtins. Cunzun el combat per la scola cristiana ha el gizzau savens e cun success la plema e mussau da tgei spért ch'el era.

En emprema lingia han denton buca quellas caussas fatg quei spiritual aschi gronds, meriteivels e beinvesius. Sper sia lavur scientifica, che tut sto renconuscher; possedeva el ina tut speciala carezia per Diu e per las olmas. Quella carezia, che haveva sias ragischs el spért profundamein religius da quei um pietus, ha menau el la via ch'el ei ius.

Entschiet ha il defunct sia carriera a Rueras da buob sco sempel paster, cavrer e nurser. Sto esser ch'el haveva, ina certa predilecziun per la clamada da pastur. Ils vegls raquentan aunc oz, ch'el hagi giu scret sco giuven student en in da ses frusts cun las panuglias-risdiv ils significonts plaids: «Jeu vegnel augsegner!» Quei sogn ideal animava pia gia da lezzas uras siu spert e muentava siu cor. El ei lu veramein vegnius augsegner ed in bien augsegner. Dus dis suenter sia messa nuviala ha il msgr. uestg tarmess sur Brugger en la pleiv gronda da Trun (1895-1912). Suenter arriva el a Mustér e pastorescha quella greva pleiv varga 30 onns. Igl onn 1921 vegn el numnaus canoni en renconuslientscha da ses gronds merets. Da biars onns eis el era staus vicari episcopal dalla Cadi. Entgins dils davos onns entupein nus Sur can. Brugger sco spiritual dil spital a Glion. Lu tuorna el a Mustér tier ses buns parents e parochians per concludar siu viadi terrester ils 11 da zercladur 1953. Las restonzas terrestras rauassan el santeri da Tujetsch.

Mo Niessegner sa, con ch'il car defunct ha prestau, unfriu e meritau en quels 82 onns da sia veta ed en ils 58 onns da siu sacerdozi. Nus savein allegar mo entgins muments da siu operar. Tgi che ha enconuschiu empau Sur can. Brugger, senuspescha da scriver bia, perquei ch'ei maunca ils vers plaids per exprimer quei, che l'olma senta. El ei buca staus in um da bia plaids e grondas bahaultschas. Sco in'umbriva passava el speras vi e ses plaids tunavan aschi migivel e solemn sco sch'els vegnessen ord la perpetnadad. Ins senteva, ch'el era in augsegner, che capeva da seconversar cun Diu e che saveva, ch'ei datti en la pastoraziun mai in ver success senza igl agid da surengiu. Sia buontad era buca fleivlezia e sia pazienzia buca negligentscha. El fuva in um dall'oraziun, che saveva spitgar, che leva mai stizzar la brastga sil lamegl e che capeva da consolar sco mo quel capescha, che senta en sesez la miseria da siu concarstgaun. Mai encureva el sesez e siu cor era promts d'unfrir tut per gidar ils auters. Clars en sias ideas, perschuadius dalla verdad e da ses principis, fideiveis a siu ideal sacerdotal, humiliteivels en siu operar, stuein nus admirar quei bien survient dil Segner, che ha operaui ton pil salit dallas olmas immortalas. Dieus datti ad el il rauas perpeten!

Sur Giusep Durschei

En Il Pelegrin Annada 54 nr. 7, fenadur 1953, pag. 146